

L'ûs dai social network al è une vore presint, ma ae frecuentazion dal mieç no corispuint une presince de lenghe anchje se Facebook al propon diversis pagjinis. » DI CHRISTIAN ROMANINI

L'ûs dai social network al è diventât une vore presint anche te vite dai furlans e fevelâ di vite reâl e vite virtuâl nol à tant sens. Ma a une frecuentazion sensibile dal mieç no corispuint une presince de lenghe furlane di bande dai utents.

Lu conferme anche la ricercje sociolinguistiche de Arlef che tal cjapitul dedicât "9. Scrivi par furlan" si lei "La lenghe furlane si conferme lenghe plui fevelade che scrite" e tal specific "La dimension de scritture intes rêts sociâls e je chê plui debile in assolût: dome il 3,4% dai locutôrs al declare di doprâ ('dispès + simpri') il furlan in chest contest, e a chê percentuâl si sume un 15% di rispuestis 'ogni tant', par un totâl complessif di 18,4%". Par fortune però si viôt anche che lis percentuâls a cressin in maniere sensibile tes fassis plui zovinis (tra i 18 e i 29 agns: 11,1% 'dispès + simpri' e 55,6% complessif; tra i 30 e i 39 agns: 8,2% 'dispès + simpri' e 44,3% complessif).

CE CHE SI CJATE ATOR

O vin dade une cjalade a Facebook che al propon diversis pagjinis in lenghe furlane. O scomencin cun chê de Arlef (950 fans), scrite dute par furlan, che e propon no dome argomentis leâts al Friûl, ma e conte anche des minorancis linguistichis forestis.

Ancje tra i ents ricognossûts de



Pôc furlan su Muselibri

Lr 29/2007 al è cui che al dopre il 'Muselibri': La Patrie dal Friûl (cuasit 6000 fans) si presente doprant dome il furlan e cuntune interazion impuartante di bande dai utents; La Societât Filologjiche Furlane (4800) e dopre anche il talian; Radio Onde Furlane (1800) che par furlan e presente pal plui la sô ativitât; Colonos (730) che doprant pal plui il furlan e vise i sostegnidôrs des ativitâts in vore; Glesie Furlane (330) dulà che si puedin viodi anche i videos de leture continue de Bibie par furlan dal 2011; Radio Spazio 103 (648) che però e dopre dome la lenghe taliane su chest mieç e Istitut ladin furlan 'pre Checo Placerean' (33, une vore pôcs). Invezit no vin rivât a cjatâ

ni 'La Grame', ni l'editôr 'Kappavu', ni la 'Societât sientifiche e tecnologicje'.

Ma di là dai ents 'istituzionai' si cjatin anche pagjinis 'spontanis' che a proponin in maniere plui o mancun 'goliardiche' la 'cause furlane': 'Fb par furlan' (cun cuasit 5.400 fans) si presente cusì "O volin Facebook in Furlan, metêt un 'Mi plàs' e invidait altre int a fâ distès"! Il lôr obietif a son 20.000 'Mi plàs'. Un numar impuartant che "Fuarce Friûl" dute par furlan e passe 20.000 fans e "Average furlan guy" cun passe 38.000 fans, ma cuntun ûs dal furlan une vore bas, a àn passât di un biel pieç.



ilfriuli@ilfriuli.it

■ CONVIT PAOLO DIACONO

Al cres il leam tra Friûl e Australie

A van indevant anche par Achest an i progjet linguistics e interculturâi che a fasin cressi il leam tra Friûl e Australie: 32 students e 2 insegnants des scuelis dal Convit 'Paolo Diacono' di Cividât a son partûts ai 16 di Lui e a tornaran ai 13 di Avost.

In Australie a son ospits di fameis dal puest e a son daûr a frecuentâ la scuele superiôr australiane, par studiâ inglès, fâ diversis ativitâts di alte formazion e aprofondi progjets di nature culturâl.

Il progjet di scambi tra la scuele cividine e chês australianis al è scomencât tal 2004 tant che prerogative dal Convit 'Paolo Diacono', e che cumò si è slargjât ae rêt Fri.Sa.Li, e e je une iniziative uniche tal so gjenar parcè che pe prime volte il Convit al colabore in maniere direte cuntun minister di istruzion forest. Cun di plui la progettualitât metode in pits e rapresente un moment di alte formazion, che e rivuarde no dome i students, ma anche i insegnants par garantîr une preparazion di alt nivel.

SCOLTADIS DI DRIUS

E comande jê!

Chel ch'al prepare gustâ e cene a cjase o soi jo. Ma e jê le me femine che mi ordene ce scjatulutis ch'o ài di viarzi.



Euronews informa

Un manuâl par furlan su la art in Friûl: il gnûf lavôr di Bepi Agostinis

Un viaç te art in Friûl contât in marilenghe. A proponilu al è Bepi Agostinis, interprete sensibile de lenghe e de culture furlane, inamorât de sô tiere, de sô storie, de sô art. E chest amôr, nassût cuant che al jere zovin, lu à puartât a difindi e promovî la identitât furlane intun percors di aprofondiment e promozion che e va de poesie, al teatri, ae art. "Storie de art in Friûl" presentât a Palaç Belgrât, al pues jessi considerât il moment plui alt dal so impegn pal Friûl, come che al à ricuardât dilunc de presentazion il moderadôr Roberto Iacovissi.

Un impegn precîs che al vûl valorizâ il Friûl e, in chest câs, il patrimoni artistic in maniere didattiche e divulgative doprant la lenghe dal sô cûr: il furlan. Par cheste carateristiche la publicazion e rapresente un unicum; di art par furlan al veve scrit dome Pieri Piçul (bons. Londero) ma il lavôr di Agostinis al è un vèr manuâl pal popul, come che al à dit, par che al

scuvierzedi e al cognossedi di dongje lis bielecis artistichis dal nestri teritori che a son cetantis e, tantis di chês, pardabon pôc cognossudis. Agostinis, midiant lis 453 pagjinis dal libri cun 130 fotos a colôrs, une bibliografie complete e un glossari, al puarte il letôr in chest percors che al cjape dentri la art romane, chê gotiche presinte in cetantis glesiis, i monuments langobarts, lis oparis dal Quaglio e dal Tiepolo e la art contemporane.

Ae presentazion a son intervignûts il president de Provincie di Udin Pietro Fontanini, l'assessor ae culture dal Comun di Udin Federico Pirone, bons. Zuan Carli Menis, che al à poiât Agostinis in chest lavôr, pe Societât Filologjiche Furlane Federico Vicario che al à rapresentât anche la Fondazione Crup, e pe ARLeF il president Lorenzo Fabbro. Ducj a àn preseât il lavôr e il grant impegn di Agostinis a pro dal Friûl e pe difese de sô identitât.



Une publicazion che e insiore inmò di plui une lenghe che, inmò de volte, e conferme dutis lis sôs potenzialitâts come codîc di comunicazion, no dome duncje te vite di ogni di. La sperance e je che l'obietif de publicazion, o ben chel di pandi la art in Friûl par furlan, si realizedi midiant une difusion largje di chest manuâl inzornât tes scuelis, tra i docents ma anche te Universitât clamade a formâ i insegnants di furlan.